

Parlamentario mr. Xiomara Ruiz-Maduro:

Pueblo mester por duna su opinion prome cu cualkier cambio di color di bandera

BANDERA di un Pais ta algo fundamental. E ta toca e alma di e Pueblo y pesey cualkier cambio mester por conta cu e comprension y sosten di e Pueblo aki. Parlamento di Aruba na un forma relampago a trata e ley pa oficialisa e codigo nobo di e color di Bandera di Aruba sin cu Pueblo di Aruba a wordo notifica di e cambio aki y por a duna su opinion riba algo asina fundamental. Pa e motibo aki nos Fraccion no por bay di acuerdo cu e forma cu Minister Oduber a scoge pa haci cambio den e ley cu ta stipula e color di nos Bandera.

E ta conoci cu diferente comision y diferente Gobierno, Minister y Parlamentarionan den transcurso di e 18 a 20 aña a traha riba e problematica di e color di e Bandera di nos Pais. Den ley conforme e deseo di nos Libertador Betico Croes e color di nos Bandera ta codifica como Larkspur UN Blue. Sinembargo na momento di su presentacion na Pueblo na 1976 a presenta un bandera cu ta diferencia di e color codifica y for di eynan a surgi e problematica di diferente color



di nos Bandera. Un problematica cu sigur nos lo kier wordo mira resolvi, pasobra no por ta posibel cu tin diferente color di nos Bandera ta wordo exponi. A dura largo berdad pa regla e color di nos Bandera, y ta hopi ta e comisionnan, ministernan, parlamentarionan cu a discuti riba esaki. Pero e motibo cu ningun di nan a tuma un decision prome ta sinta den e hecho cu tur hende den fondo di su curason ta consciente cu un Bandera di un

Pais ta algo asina fundamental cu un grupo so no tin e autoridad pa por haci cambio aden sin cu e Pueblo mes vocifera su opinion prome.

Bandera di un Pais ta un simbolo pa unifica un Pais y no dividi esaki. Pesey lo tabata na su lugha pa Minister Oduber presenta e cambio proponi na Pueblo di Aruba y laga Pueblo sa pakico e cambionan aki ta tuma lugha y compronde pakico e color cu e Bandera lo tin awor en adelante lo ta diferente na esun cu Pueblo ta custuma cune. Den un mocion nos Fraccion a pidi Minister Odu-



ber pa consulta prome cu Pueblo, pero Fraccion di AVP y tampoco Minister Oduber tabata kier a scucha e bos di Pueblo riba un tema asina fundamental como e color di e Bandera di nos Pais. Consecuencia di e cambio aki ta cu e Pueblo ta wordo dividi innecesariamente.

Gabinete Eman, e Fraccion di AVP y sigur Minister Oduber mester compronde cu ningun mayoria den Parlamento di 13 asiento, ningun minister no por para riba e Voz di Pueblo. Bandera di Aruba ta algo asina fundamental, e ta touch e alma di e Pueblo aki y bo no por tin e pretension di haci cambionan fundamental sin scucha e voz di Pueblo prome. Voz di Pueblo ta Voz di Dios y ningun mayoria por trapa riba esey.